



舒梓溪全集 二十



漢書門			
一	一	一	一
四	一	七	四
冊	架	函	號

內閣文庫			
三	一	一	一
六	四	一	一
函	冊	號	類

內閣文庫	
番號	漢 10417
冊數	14 (14)
函號	316 159





舒梓溪先生全集二十

內集卷之八

周禮定本十一

周禮正經

夏官篇

大司馬之職掌建邦之九灋以佐王平邦國制畿封
 國以正邦國設儀辨位以等邦國進賢興功以作
 邦國建牧立監以維邦國制軍詰禁以糾邦國施
 貢分職以任邦國簡稽鄉民以用邦國均守平則
 以安邦國比小事大以和邦國以九代之灋正邦

淺草文庫

國馮弱犯寡則肯之賊賢害民則伐之暴內陵外
則壇之野荒民散則削之負固不服則侵之賊殺
其親則正之放弑其君則殘之犯令正政則杜之
外內亂鳥獸行則滅之正月之吉始和布政于邦
國都鄙乃縣政象之灋于象魏使萬民觀政象挾
日而歛之中春教振旅司馬以旗致民平列陳如
戰之陳辨鼓鐸鑼鑿之用王執路鼓諸侯執賁鼓
軍將執晉鼓師帥執提旅帥執鞶卒長執鐃兩司
馬執鐸公司馬執鑿以教坐作進退疾徐䟽數之
節遂以蒐田有司表貉誓民鼓遂圍禁火弊獻禽

以祭社中夏教菱舍如振旅之陳群吏撰車徒讀
書契辨號名之用帥以門名縣鄙各以其名家以
號名鄉以州名野以邑名百官各象其事以辨軍
之夜事其皆如振旅遂以苗田如蒐之灋車弊獻
禽以享初中秋教治兵如振旅之陳辨旗物之用
王載大常諸侯載旅軍吏載旗師都載旌鄉遂載
物郊野載旒百官載旗各書其事與其號焉其他
皆如振旅遂以彌田如蒐田之灋羅弊致禽以枋
枋中冬教大閱前期群吏戒衆庶脩戰法虞人萊
所田之野為表百步則一為三表又五十步為一

表田之日司馬建旗于後表之中群吏以旗物鼓鐸鑼各帥其民而致質明弊旗誅後至者乃陳車徒如戰之陳皆坐群吏聽誓于陳前斬牲以左右徇陳曰不用命者斬之中軍以輦令鼓鼓人皆三鼓司馬振鐸群吏作旗車徒皆作鼓行鳴鐸車徒皆行及表乃止三鼓攙鐸群吏弊旗車徒皆坐又三鼓振鐸作旗車徒皆作鼓進鳴鑼車驟徒趨及表乃止坐作如初乃鼓車馳徒走及表乃止鼓戒三闕車三發徒三刺乃鼓退鳴鑼且卻及表乃止坐作如初遂以狩田以旌為左右和之門群吏

各帥其車徒以敘和出左右陳車徒有司平之旗居卒間以分地前後有屯百步有司巡其前後險野人為主易野車為主既陳乃設驅逆之車有司表貉于陳前中軍以輦令鼓鼓人皆三鼓群司馬振鐸車徒皆作遂鼓行徒御枚而進大獸公之小禽私之獲者取左耳及所弊鼓皆駘車徒皆譟徒乃弊致禽饁獸于郊入獻禽以享烝及師大合軍以行禁令以救無辜伐有罪若大師則掌其戒令蒞大卜帥執事涖釁主及軍器及致建大常比軍衆誅後至者及戰巡陳眡事而賞罰若師有功則

左執律右秉鉞以先愷樂獻于社若師不功則厭而奉主車王弔勞士庶子則相大役與慮事屬其植其要以待攷而賞誅大會同則帥士庶子而掌其政令若大射則合諸侯之六耦大祭祀饗食羞牲魚授其祭大喪平士大夫喪祭奉詔馬牲

小司馬之職掌凡小祭祀會同饗射師田喪紀掌其事如大司馬之灋

軍司馬掌邦比之灋以作軍旅五家為比五比為閭四閭為族五族為黨五黨為州五州為鄉凡制軍萬有二千五百人為軍王六軍大國三軍次國二

軍小國一軍軍將皆命卿二千有五百人為師帥帥皆中大夫五百人為旅旅帥皆下大夫百人為卒卒長皆上士二十五人為兩兩司馬皆中士五人為伍伍皆有長一軍則二府六史胥十人徒百

人
輿司馬 亡

行司馬 亡

都司馬掌都之士庶子及其衆庶車馬兵甲之戒令以國灋掌其政學以聽國司馬家司馬亦如之

舊本
在末訂
移于此

司士掌群臣之版以治其政令歲登下其損益之數
辨其年歲與其貴賤周知邦國都家縣鄙之數卿
大夫士庶子之數以詔王治以德詔爵以功詔祿
以能詔事以久奠食唯賜無常正朝儀之位辨其
貴賤之等王南鄉三公北面東上孤東面北上卿
大夫西面北上王族故士虎士在路門之右南面
東上大僕大右大僕從者在路門之左南面西上
司士擯孤卿特揖大夫以其等旅揖士旁三揖王
還揖門左揖門右大僕前王入內朝皆退掌國中
之士治凡其戒令掌擯士者膳其摯凡祭祀掌士

之戒令詔相其法事及賜爵呼昭穆而進之帥其
屬而割牲羞俎豆凡會同作士從賓客亦如之作
士適四方使爲介大喪作士掌事作六軍之士執
披凡士之有守者令哭無去守國有故則致士而
頒其守凡邦國三歲則稽士任而進退其爵祿舊本
在掌
畜後
射人掌以射法治射儀王以六耦射三侯三獲三容
樂以騶虞九節五正諸侯以四耦射二侯二獲二
容樂以貍首七節三正孤卿大夫以三耦射一侯
一獲一容樂以采蘋五節二正士以三耦射豻侯

一獲一容樂以采繁五節二正若王大射則以貍
 一步張三猴王射則令去侯立于後以矢行告卒令
 取矢祭侯則為位與大史數射中佐司馬治射正
 祭祀則贊射牲相孤卿大夫之灋儀會同朝覲作
 大夫介凡有爵者大師令有爵者乘王之倅車有
 大賓客則作卿大夫從戒大史及大夫介大喪與
 僕人遷尸作卿大夫掌事比其廬不敬者苛罰之
舊本在挈
 壺氏後

虎賁氏掌先後王而趨以卒伍軍旅會同亦如之舍
 則守王間王在國則守王宮國有大故則守王門

大喪亦如之及葬從遣車而哭適四方使則從士
 大夫若道路不通有徵事則奉書以使於四方舊本

在司
 右後

旅賁氏掌執戈盾夾王車而趨左八人右八人車止
 則持輪凡祭祀會同賓客則服而趨喪紀則衰葛
 執戈盾軍旅則介而趨

節服氏掌祭祀朝覲袞冕六人維王之犬常諸侯則
 四人其服亦如之郊祀表冕二人執戈送逆尸從
 車

掌固掌脩城郭溝池樹渠之固頒其士庶子及其衆

庶之守設其飾器分其財用均其稍食任其萬民
 用其材器凡守者受灋焉以通守政有移甲與其
 役財用唯是得通與國有司帥之以贊其不足者
 晝三巡之夜亦如之夜三鑿以號戒若造都邑則
 治其固與其守灋凡國都之竟有溝樹之固郊亦
 如之民皆有職焉若有山川則因之舊本在司燿後
 司險掌九州之國以周知其山林川澤之阻而達其
 道路設國之五溝五涂而樹之林以為阻固皆有
 守禁而達其道路國有故則藩塞阻路而止行者
 以其屬守之唯有節者達之

巾車掌公車之政事辨其用與其旗物而等敘之以
 治其出入王之五路一曰玉路錫樊纓十有再就
 建大常十有二旒以祀金路鈎樊纓九就建大旂
 以賓同姓以封象路朱樊纓七就建大赤以朝異
 姓以封革路龍勒條纓五就建大白以即戎以封
 四衛木路前樊鵠纓建大麾以田以封蕃國王后
 之五路重翟錫面朱總厭翟勒面績總安車彫面
 鷲總皆有容蓋翟車貝面組總有握輦車組輓有
 斐羽蓋王之喪車五乘木車蒲蔽大禭尾橐疏小
 服皆疏素車芬蔽大禭素飾小服皆素藻車藻蔽

鹿淺禊革飾駢車翟蔽然禊髻飾漆車藩蔽豸禊
 雀飾服車五乘孤乘夏篆鄉乘夏縵大夫乘墨車
 士乘棧車庶人乘役車凡良車散車不在等者其
 用無常凡車之出入歲終則會之凡賜闕之毀折
 入齋于職幣大喪飾遣車遂廡之行之及葬執蓋
 從車持旌及墓嘑啓闕陳車小喪共匱路與其飾
 歲時更續共其弊車大祭祀鳴鈴以應雞人
 典路掌王及后之五路辨其名物與其用說若有大
 祭祀則出路贊駕說大喪大賓客亦如之凡會同
 軍旅弔于四方以路從

車僕掌戎路之萃廣車之萃闕車之萃革之萃輕車

之萃凡師共革車各以其萃會同亦如之大喪廡

革車大射共三乏

以上三職舊本屬春官訂移于此說見敘辨

司右掌群右之政令凡軍旅會同合其車之率伍而

比其乘屬其右凡國之勇力之士能用五兵者屬

焉掌其政令

戎右掌戎車之兵革使詔贊王鼓傳王命于陳申會

同充革車盟則以玉敦辟盟遂役之贊半耳桃莢

舊本右
稟人後

齊右掌祭祀會同賓客前齊車三乘則持馬行則陪

乘凡有牲事則前馬

道右掌前道車王出入則持馬陪乘如齊車之儀自

車上諭命于從車詔王之車儀王式則下前馬王

下則以蓋從

大馭掌馭王路以祀及犯較王自左馭馭下祀登受

轡犯較遂驅之及祭酌僕僕左執轡右祭兩軹祭

軌乃飲凡馭路行以肆夏趨采齊凡馭路儀以鸞

和為節

戎僕掌馭戎車掌王倅車之政正其服犯較如玉路

之儀凡巡守及兵車之會亦如之掌凡戎車之儀

齊僕掌馭金路以賓朝覲宗遇饗食皆乘金路其灋

儀各以其等為車送逆之節

道僕掌馭象路以朝夕燕出入其灋儀如齊車掌貳

車之政令

田僕掌馭田路以田以鄙掌佐車之政設驅逆之車

令獲者植旌及獻比禽凡田王提馬而走諸侯晉

大夫馳

馭夫掌馭貳車從車使車分公馬而駕治之

校人掌王馬之政辨六馬之屬種馬一物戎馬一物

齊馬一物道馬一物田馬一物駕馬一物凡頒良

馬而養乘之乘馬一師四圉三乘為阜阜一趣馬
三阜為繫繫馭夫六繫為廢廢一僕夫六廢成校
校有左右駑馬三良馬之數麗馬一圉八麗一師
八師一趣馬八趣馬一馭夫天子十有二閑馬六
種邦國六閑馬四種家四閑馬二種凡馬特居四
之一春祭馬祖執駒夏祭先牧頒馬攻特秋祭馬
社臧僕冬祭馬步獻馬講馭夫凡大祭祀朝覲會
同毛馬而頒之飾幣馬執扑而從之凡賓客受其
幣馬大喪飾遺車之馬及堊埋之田獵則帥驅逆
之車凡將事于四海山川則飾黃駒九國之使者

共其幣馬凡軍事物馬而頒之等馭夫之祿

馬質掌質馬量三物一曰戎馬二曰田馬三曰駑馬
皆有物賈綱惡馬凡受馬於有司者書其齒毛與
其賈馬死則旬之內更旬之外入馬耳以其物更
其外否馬及行則以任齊其行若有馬訟則聽之

禁原蠶者

舊本在
司勳後

趣馬掌贊正良馬而齊其飲食簡其六節掌駕說之

頒辨四時之居治以聽馭夫

舊本在
校人後

巫馬掌養疾馬而乘治之相醫而藥攻馬疾受財于
校人馬死則使其賈粥之入其布于校人

牧師掌牧地皆有厲禁而頒之孟春焚牧中通淫掌其政令凡田事贊焚萊

廋人掌十有二閑之政教以阜馬佚特教駢攻駒及祭馬祖祭閑之先牧及執駒散馬耳圉馬正校人員選馬八尺以上為龍七尺以上為騾六尺以上為馬

圉師掌教圉人養馬春除蓍廢始牧夏庠馬冬獻馬射則充楛質茨牆則翦鬮
圉人掌養馬芻牧之事以役圉師凡賓客喪紀牽馬而入陳廡馬亦如之

司甲 亡

司兵掌五兵五盾各辨其物與其等以待軍事及授兵從司馬之灋以頒之及其受兵輸亦如之祭祀授舞者兵大喪廡五兵軍事建車之五兵會同亦如之

司戈盾掌戈盾之物而頒之祭祀授旅賁及故士戈盾授舞者兵亦如之軍旅會同授貳車戈盾建乘車之戈盾授旅賁及虎士戈盾及舍設藩盾行則歛之

司弓矢掌六弓四弩八矢之灋辨其名物而掌其守

藏與其出入中春獻弓弩中秋獻矢箛及其頒之
王弓弧以授射甲革楛質者夾弓廋弓以授射豨
侯鳥獸者唐弓大弓以授學射者使者勞者其矢
箛皆從其弓凡弩夾廋利攻守唐大利車戰野戰
凡矢枉矢絜矢利火射用諸守城車戰殺矢鏃矢
用諸近射田獵矰矢箝矢用諸弋射恒矢痺矢用
諸散射天子之弓合九而成規諸侯合七而成規
大夫合五而成規士庶合三而成規句者謂之幣
弓凡祭祀共射牲之弓矢澤共射楛質之弓矢大
射燕射共弓矢如數并夾大喪共明弓矢凡師役

會同頒弓弩各以其物從授兵甲之儀田弋充籠
箛矢共矰矢凡亡矢者弗用則更

繕人掌王之用弓弩矢箛矰弋挾拾掌詔王射贊王
弓之事凡乘車充其籠箛載其弓弩既射則斂之
無會計

橐人掌受財于職金以齎其工弓六物為三等弩四
物亦如之矢八物皆三等箛亦如之春獻素秋獻
成書其等以饗工乘其事試其弓弩以下上其食
而誅賞乃入功于司弓矢及繕人凡齎財與其出
入皆在橐人以待會而攷之亡者闕之

環人掌致師察軍慝巡邦國搏謀賊訟敵國揚軍旅
降圍邑掌送逆邦國之通賓客以路節達諸四方
舍則授館令聚橐有任器則令環之凡門關無幾

送逆及疆

舊本在
候人後

自掌送逆以下三十九字係舊本秋官環
人之職采俞氏說併入于此詳見敘辨

挈壺氏掌壺以令軍井挈轡以令舍挈畚以令糧凡
軍事縣壺以序聚橐凡喪縣壺以代哭者皆以水
火守之分以日夜及冬則以爨爨鬲水而沸之而
沃之

司常掌九旗之物名各有屬以待國事日月為常交

龍為旂通帛為旛雜帛為物熊虎為旗鳥隼為旟
龜蛇為旐全羽為旛析羽為旌及國之大閱贊司
馬頒旗物王建大常諸侯建旗孤卿建旛大夫士
建物師都建旗州里旗縣鄙建旐道車載旐旂車
載旌皆畫其象焉官府各象其事州里各象其事
州里各象其名家各象其號凡祭祀各建其旗會
同賓客亦如之置旌門大喪共銘建廡車之旌及
喪亦如之凡軍事建旌旗及致民致旗弊之甸亦
如之凡射共獲旌歲時共更旌舊本屬春官
在車僕之後
懷方氏掌來遠方之民致方貢致遠物而送逆之達

之以節治其委積館舍飲食

合方氏掌達天下之道路通其財利同其數噐壹其度量除怨惡同其好善

訓方氏掌道四方之政事與其上下之志誦四方之傳道正歲則布而訓四方而觀新物

匡人掌達灋則匡邦國而觀其慝使無敢反側以聽

王命

揮人掌誦王志道國之政事以巡天下之邦國而語之使萬民和說而正王面

大行人掌大賓之禮及大客之儀以親諸侯春朝諸

侯而圖天下之事秋覲以比邦國之功夏宗以陳天下之謨冬遇以協諸侯之慮時會以發四方之禁殷同以施天下之政時聘以結諸侯之好殷覲以除邦國之慝間問以知諸侯之志歸賑以交諸侯之福慶賀以贊諸侯之喜致禴以補諸侯之裁以九儀辨諸侯之命等諸臣之爵以同邦國之禮而待其賓客上公之禮執桓圭九寸纁藉九寸冕服九章建常九旒樊纓九就貳車九乘介九人禮九牢其朝位賓主之間九十步立當車軹擯者五人廟中將幣三享王禮再裸而酢饗禮九舉出入

五積三問三勞諸侯之禮執信圭七寸纁藉七寸
冕服七章建常七旒樊纓七就貳車七乘介七人
禮七牢朝位賓主之間七十步立當前疾擯者四
人廟中將幣三享王禮壹裸而酢饗禮七獻食禮
七舉出入四積再問再勞諸伯執躬圭其他皆如
諸侯之禮諸子執穀璧五寸纁藉五寸冕服五章
建常五旒樊纓五就貳車五乘介五人禮五牢朝
位賓客之間五十步立當車衡擯者三人廟中將
幣三享王禮壹裸不酢饗禮五獻食禮五舉出入
三積壹問壹勞諸男執蒲璧其他皆如諸子之禮

凡大國之孤執皮帛以繼小國之君出入三積不
問一勞朝位當車前不交擯廟中無相以酒禮之
其他皆眡小國之君凡諸侯之卿其禮各下其君
二等以下及其大夫士皆如之邦畿方千里其外
方五百里謂之侯服歲一見其貢祀物又其外方
五百里謂之甸服二歲一見其貢嬪物又其外方
五百里謂之男服三歲一見其貢器物又其外方
五百里謂之采服四歲一見其貢服物又其外方
五百里謂之衛服五歲一見其貢材物又其外方
五百里謂之要服六歲一見其貢貨物九州之外

謂之蕃國世壹見各以其所貴寶爲摯王之所以
撫邦國諸侯者歲徧存三歲徧覘五歲徧省七歲
屬象胥諭言語協辭命九歲屬瞽史諭書名聽聲
音十有一歲達瑞節同度量成牢禮同數器脩法
則十有二歲王巡守殷國凡諸侯之王事辨其位
正其等協其禮賓而見之若有大喪則詔相諸侯
之禮若有四方之大事則受其幣聽其辭凡諸侯
之邦交歲相問也殷相聘也世相朝也
小行人掌邦國賓客之禮籍以待四方之使者令諸
侯春入貢秋獻功王親受之各以其國之籍禮之

凡諸侯入王前則逆勞于畿及郊勞胝館將幣爲
承而擯凡四方之使者大客則擯小客則受其幣
而聽其辭使適四方協九儀賓客之禮朝覲宗遇
會同君之禮也存覘省聘問臣之禮也達天下之
六節山國用虎節土國用人節澤國用龍節皆以
金爲之道路用旌節門關用符節都鄙用管節皆
以竹爲之成六瑞王用璜圭公用桓圭侯用信圭
伯用躬圭子用穀璧男用蒲璧合六幣圭以馬璋
以皮璧以帛琮以錦琥以繡璜以黼此六物者以
和諸侯之好故若國禮喪則令賻補之若國凶荒

則令調委之若國師役則令槁禴之若國有福事則令慶賀之若國有禍裁則令哀吊之凡此五物者治其事故及其萬民之利害為一書其禮俗政事教治刑禁之逆順為一書其悖逆暴亂作慝猶犯令者為一書其札喪凶荒厄貧為一書其康樂和親安平為一書凡此五物者每國辨異之以反命于王以周知天下之故

司儀掌九儀之賓客擯相之禮以詔儀容辭令揖讓之節將各諸侯則令為壇三成宮旁一門詔王儀南鄉見諸侯土揖庶姓時揖異姓天揖同姓及其擯之各以其禮公於上等侯伯於中等子男於下等其將幣亦如之其禮亦如之王燕則諸侯毛凡諸公相為賓主國五積三問皆三辭拜受皆旅擯再勞三辭三揖登拜受拜送主君郊勞交擯三辭車逆拜辱三揖三辭拜受車送三還再拜致館亦如之致殮如致積之禮及將幣交擯三辭車逆拜辱賓車進答拜三揖三讓每門止一相及廟唯上相入賓三揖三讓登再拜授幣賓拜送幣每事如初賓亦如之及出車送三請三進再拜賓三還三辭告辟致饗餼還圭饗食致贈郊送皆如將幣之

儀賓之拜禮拜饗餼拜饗食賓繼主君皆如主國之禮諸侯諸伯諸子諸男之相爲賓也各以其禮相待也如諸公之儀諸公之臣相爲國客則三積皆三辭拜受及大夫郊勞旅擯三辭拜辱三讓登聽命下拜登受賓使者如初之儀及退拜送致館如初之儀及將幣旅擯三辭拜逆客辟三揖每門止一相及廟唯君相入三讓客登拜客三辟授幣下出每事如初之儀及禮私面私獻皆再拜稽首君答拜出及中門之外問君客再拜對君拜客辟而對君問大夫客對君勞客客再拜稽首君答拜

客趨辟致饗餼如勞之禮饗食還圭如將幣之儀君館客客辟介受命遂送客從拜辱于朝明日客拜禮賜遂行如入之積凡侯伯子男之臣以其國之爵相爲客而相禮其儀亦如之凡四方之賓客禮儀辭命餼牢賜獻以二等從其爵而上下之凡賓客送逆同禮凡諸侯之交各稱其邦而爲之幣以其幣爲之禮凡行人之儀不朝不夕不正其主面亦不背客

行夫掌邦國傳遽之小事媿惡而無禮者凡其使也必以旌節雖道有難而不時必達居於其國則掌

行人之勞辱事焉使則介之

候人各掌其方之道治與其禁令以設候人若有方治則帥而致于朝及歸送之于竟

掌客掌四方賓客之牢禮餼獻飲食之等數與其政治王合諸侯而享禮則具十有二牢庶具百物備諸侯長十有再獻王巡守殷國君膳以牲犢令百官百姓皆具從者三公眡上公之禮卿眡侯伯之禮大夫眡子男禮士眡諸侯之卿禮庶子亦眡其大夫之禮凡諸侯之禮上公五積皆眡殮宰三皆群介行人宰史皆有牢殮五牢食四十簠十豆四

十劔四十有二壺四十鼎簋十有二牲三十有六皆陳饗餼九牢其死牢如殮之陳牽四牢米百有二十筥醢醢百有二十壘車皆陳車米眡生牢牢十車車乘有五斂車禾眡死牢牢十車車三秬芻薪倍禾皆陳乘禽日九十雙殷膳大牢以及歸三饗三食三燕若弗酌則以幣致之凡介行人牢史皆有殮饗餼以其爵等爲之牢禮之陳數唯上介有禽獻夫人致禮八壺八豆八籩膳大牢致饗大牢食大牢卿皆見以羔膳大牢侯伯四積皆眡殮牽再問皆脩殮四牢食三十有二簋八豆三十有

二劔二十有八壺三十有二鼎簋十有二腥二十有七皆陳饗餼七牢其死牢如殮之陳牽三牢米百筥醢醢百甕皆陳米三十車禾四十車芻薪倍禾皆陳乘禽日七十雙殷膳大牢三饗再食再燕凡介行人牢史皆有殮饗餼以其爵等爲之禮唯上介有禽獻夫人致禮八壺八豆八籩膳大牢致饗大牢卿皆見以羔膳特牛子男三積皆眡殮牽一問以脩殮三牢食二十有四簋六豆二十有四劔十有八壺二十有八壺二十有四鼎簋十有二牲十有八皆陳饗餼五牢其死牢如殮之陳牽二

牢米八十筥醢醢八十甕皆陳米二十車禾三十車芻薪倍禾皆陳乘禽日五十雙一饗一食一燕凡介行人宰史皆有殮饗餼以其爵等爲之禮唯上介有禽獻夫人致禮六壺六豆六籩膳眡致饗親見卿皆膳特牛凡諸侯之卿大夫士爲國客則如其介之禮以待之凡禮賓客國新殺禮凶荒殺禮札喪殺禮禍哉殺禮在野在外殺禮凡賓客死致禮以喪用賓客有喪唯芻稍之受遭主國之喪不受饗食受牲禮

象胥掌蠻夷閩貉戎狄之用使掌傳王之言而諭說

焉以和親之若以時入賓則協其禮與其辭言傳之凡其出入送逆之禮節幣帛辭令而賓相之凡國之大喪詔相國之禮儀而正其位凡軍旅會同受國客幣而賓禮之凡作事王之大事諸侯次事卿次事大夫次事上士下事庶子

掌節掌守邦節而辨其用以輔王命守邦國者用玉節守都鄙者用節凡邦國之使節山國用虎節土國用人節澤國用龍節皆金也以英蕩輔之門閔用符節貨賄用璽節道路用旌節皆有期以反節凡通達於天下者有節以傳輔之無節者有幾則

不達

舊本屬地官

掌交掌以節與幣巡邦國之諸侯及其萬民之所聚者道王之德意志慮使咸知王之好惡辟行之使和諸侯之好達萬民之說掌邦國之通事而結其交好以諭九稅之利九禮之親九牧之維九禁之難九戎之威右大小行人司儀行夫掌客象胥掌交舊本屬秋官訂移于此說見敘辨服不氏掌養猛獸而教擾之凡祭祀共猛獸賓客之事則杭皮射則贊張侯以旌居乏而待獲舊本在射人後射鳥氏掌射鳥祭祀以弓矢毆鳥鳶凡賓客會同軍旅亦如之射則取矢在侯高則以并夾取之

羅氏掌羅鳥鳥蜡則作羅襦中春羅春鳥獻鳩以養
國老行羽物

周禮定本十二

周禮正經

秋官篇

大司寇之職掌建邦之三典以佐王刑邦國一曰刑
新國用輕典二曰刑平國用中典三曰刑亂國用
重典以五刑糾萬民一曰野刑上功糾力二曰軍
刑上命糾守三曰鄉刑上德糾孝四曰官刑上能
糾職五曰國刑上愿糾暴以圜土聚教罷民凡害

人者寘之圜土而施職事焉以明刑耻之其能改
者反于中國不齒三年其不能改而出圜土者殺
以兩造禁民訟入束矢于朝然後聽之以兩劑禁
民獄入鈞金三日乃致于朝然後聽之以嘉石平
罷民凡萬民之有罪過而未麗於灋而害於州里
者桎梏而坐諸嘉石役諸司空重罪旬有三日坐
朞役其次九日坐九月役其次七日坐七月役其
次五日坐五月役其次下罪三日坐三月役使州
里任之則宥而舍之以肺石達窮民凡遠近慄獨
老幼之欲有復於上而其長弗達者立於肺石三

日士聽其辭以告於上而罪其長正月之吉始和
 布刑於邦國都鄙乃縣刑象之灋于象魏使萬民
 觀刑象挾日而歛之凡邦之大盟約涖其盟書而
 登之于天府此下舊本有凡諸侯至弊之大祭祀
 奉犬牲若禋祀五帝則戒之日涖誓百官戒于百
 族及納亨前王祭之日亦如之奉其明水火凡朝
 覲會同前王大喪亦如之大軍旅涖戮于社凡邦
 之大事使其屬蹕

小司寇之職掌外朝之政以致萬民而詢焉一曰詢
 國危二曰詢國遷三曰詢立君其位王南鄉三公

及州長百姓北面群臣西面群吏東面小司寇擯
 敘進而問焉以衆輔志而弊謀以五刑聽萬民之
 獄訟附于刑用情訊之至于旬乃弊之讀書則用
 灋凡命夫命婦不躬坐獄訟凡王之同族有罪不
 即市以五聲聽獄訟求民情一曰辭聽二曰色聽
 三曰氣聽四曰耳聽五曰目聽以八辟麗邦灋附
 刑罰一曰議親之辟二曰議故之辟三曰議賢之
 辟四曰議能之辟五曰議功之辟六曰議貴之辟
 七曰議勤之辟八曰議賓之辟以三刺斷庶民獄
 訟之中一曰訊群臣二曰訊群吏三曰訊萬民聽

民之所刺宥以施上服下服之刑小祭祀奉犬牲
凡禋祀五帝實饗水納亨亦如之大賓客前王而
辟后世子之喪亦如之小師涖戮凡國之大事使
其屬蹕孟冬祀司民獻民數於王王拜受之及大
比登民數自生齒以上登于天府歲終則令群士
計獄弊訟登中于天府正歲帥其屬而觀刑象令
以木鐸曰不用灋者國有常刑令群士乃宣布于
四方憲刑禁乃命其屬入會乃致事

士師之職掌國之五禁之灋以左右刑罰一曰宮禁
二曰官禁三曰國禁四曰野禁五曰軍禁皆以木

鐸徇之于朝書而縣于門閭以五戒先後刑罰毋
使罪麗于民一曰誓用之于軍旅二曰誥用之于
會同三曰禁用諸田役四曰糾用諸國中五曰憲
用諸都鄙掌鄉各州黨族閭比之聯與其民人之
什伍使之相安相受以比追胥之事以施刑罰慶
賞掌官中之政令察獄訟之辭以詔司寇斷獄弊
訟致邦令掌士之八成一曰邦汭二曰邦賊三曰
邦諜四曰犯邦令五曰擣邦令六曰爲邦盜七曰
爲邦朋八曰爲邦誣凡諸侯之獄訟以邦典定之
凡卿大夫之獄訟以邦法斷之凡庶民之獄訟以

邦成弊之凡以財獄訟者正之以傳別約劑若祭
勝國之社稷則爲之尸王燕出入則前驅而辟祀
五帝則沃尸及王盥洎鑊水凡刳珥則奉犬牲諸
侯爲賓則帥其屬而蹕于王宮大喪亦如之大師
帥其屬而禁逆軍旅者與犯師禁者而戮之歲終
則令正要會正歲帥其屬而憲禁令于國及郊野
鄉士掌國中各掌其鄉之民數而糾戒之聽其獄訟
察其辭辯其獄訟異其死刑之罪而要之旬而職
聽于朝司寇聽之斷其獄弊其訟于朝群士司刑
皆在各麗其灋以議獄訟獄訟成士師受中協日

刑殺肆之三日若欲免之則王會其期大祭祀大
喪紀大軍旅大賓客則各掌其卿之禁令帥其屬
夾道而蹕三公若有邦事則爲之前驅而辟其喪
亦如之凡國有大事則戮其犯命者
遂士掌四郊各掌其遂之民數而糾其戒令聽其獄
訟察其辭辯其獄訟異其死刑之罪而要之二旬
而職聽于朝司寇聽之斷其獄弊其訟于朝群士
司刑皆在各麗其灋以議獄訟獄訟成士師受中
協日就郊而刑殺各於其遂肆之三日若欲免之
則王令三公會其期若邦有大事聚衆庶則各掌

其遂之禁令帥其屬而蹕六卿若有邦事則爲之前驅而辟其喪亦如之凡郊有大事則戮其犯命者

縣士掌野各掌其縣之民數糾其戒令而聽其獄訟察其辭辨其獄訟異其死刑之罪而要之三旬而職聽于朝司寇聽之斷其獄弊其訟于朝群士司刑皆在各麗其灋以議獄訟獄訟成士師受中協日刑殺各就其縣肆之三日若欲免之則王命六卿會其期若邦有大役聚衆庶則各掌其縣之禁令若大夫有邦事則爲之前驅而辟其喪亦如之凡野有大事則戮其犯命者

方士掌都家聽其獄訟之辭辨其死刑之罪而要之三月而上獄訟于國司寇聽其成于朝群士司刑皆在各麗其灋以議獄訟獄訟成士師受中書其刑殺之成與其聽獄訟者凡都家之大事聚衆庶則各掌其方之禁令以時脩其縣灋若歲終則省之而誅賞焉

訝士掌四方之獄訟諭罪刑于邦國凡四方之有治於士者造焉四方有亂獄則徃而成之邦有賓客則與行人送逆之入於國則爲之前驅而辟野亦

如之居館則帥其屬而為之蹕誅戮暴客者出入則道之有治則贊之凡邦之大事聚衆庶則讀其誓禁

朝士掌建邦外朝之灋左九棘孤卿大夫位焉群士在其後右九棘公侯伯子男位焉群吏在其後面三槐三公位焉州長衆庶在其後左嘉石平罷民焉右肺石達窮民焉帥其屬而以鞭呼趨且辟禁慢朝錯立族談者凡得獲貨賄人民六畜者委于朝告于士旬而舉之大者公之小者庶民私之凡士之治有期日國中一旬郊二旬野三旬都三月

邦國朞期內之治聽其外不聽凡有責者有判書以治則聽凡民同貨財者令以國灋行之犯令者刑罰之凡屬責者以其地傳而聽其辭凡盜賊軍鄉邑及家人殺之無罪凡報仇讎者書於士殺之無罪若邦凶荒札喪寇戎之故則令邦國都家縣鄙慮刑貶

都士亡
家士亡

司民掌登萬民之數自生齒以上皆書於版辨其國中與其都鄙及其郊野異其男女歲登下其死生

及三年大比以萬民之數詔司寇司寇及孟冬祀
司民之日獻其數于王王拜受之登于天府內史
司會冢宰貳之以贊王治

司刑掌五刑之灋以麗萬民之罪墨罪五百劓罪五
百宮罪五百剕罪五百殺罪五百若司寇斷獄弊
訟則以五刑之灋詔刑罰而以辨罪之輕重

司刺掌三刺三宥三赦之灋以贊司寇聽獄訟一刺
曰訊群臣再刺曰訊群吏三刺曰訊萬民一宥曰
不識再宥曰過失三宥曰遺忘一赦曰幼弱再赦
曰老旄三赦曰蠢愚以此三法者求民情斷民中

而施上服下服之罪然後刑殺

司烜氏掌以夫遂取明火於以鑿取明水於月以供
祭祀之明盥明燭共明水凡邦之大事共墳燭庭
燎中春以木鐸脩火禁于國中軍旅脩火禁邦若
屋誅則爲明竈焉舊本在司
寤氏後

司約掌邦國及萬民之約劑治神之約爲上治民之
約次之治地之約次之治功之約次之治噐之約
次之治摯之約次之凡大約劑書於宗彝小約劑
書於冊圖若有訟者則珥而碎藏其不信者服墨
刑若大亂則六官碎藏其不信者殺

司盟掌盟載之灋凡邦國有疑會同則掌其盟約之載及其禮儀北面詔盟神既盟則貳之盟萬民之犯命者詛其不信者亦如之凡民之有約劑者其貳在司盟有獄訟者則使之盟詛凡盟詛各以其地域之衆庶共其牲而致焉既盟則爲司盟共其

酒脯

職金掌凡金玉錫石丹青之戒令受其入征者辨其物之嫩惡與其數量揭而璽之入其金錫于爲兵器之府入其玉石丹青于守藏之府入其要掌受士之金罰貨罰入于司兵旅于上帝則共其金版

饗諸侯亦如之凡國有大故而用金石則掌其令

禁殺戮掌司斬殺戮者凡傷人見血而不以告者攘

獄者遇訟者以告而誅之

舊本在布憲後

禁暴氏掌禁庶民之亂暴力正者擣誣犯禁者作言語而不信者以告而誅之凡國聚衆庶則戮其犯禁者以徇凡奚隸聚而出入者則司牧之戮其犯禁者

野廬氏掌達國道路至于四畿比國郊及野之道路宿息井樹若有賓客則令守涂地之人聚橐之有相翔者誅之凡道路之舟車輦互者敘而行之凡

有節者及有爵者至則爲之辟禁野之橫行踰徑者九國之大事比脩除道路者掌九道禁邦之大師則令埽道路且以幾禁行作不時者不物者

司寤氏掌夜時以星分夜以詔夜士夜禁禦晨行者

禁宵行者夜遊者

舊本在萍氏後

脩閭氏掌比國中宿互櫟者與其國粥而比其追胥者而賞罰之禁徑踰者與以兵革趨行者與馳騁於國中者邦有故則令守其閭互唯執節者不幾

舊本在條狼氏後

銜枚氏掌司囂國之大祭祀令禁無跽軍旅田役令

銜枚禁跽呼嘆鳴於國中者行歌哭於國中之道

舊本在庭氏後

掌訝掌邦國之等籍以待賓客若將有國賓客至則戒官脩委積與士逆賓于疆爲前驅而入及宿則令聚櫟及委則致積至于國賓入館次于舍門外待事于客及將幣爲前驅至于朝詔其位入復及退亦如之凡賓客之治令訝訝治之凡從者出則使人道之及歸送亦如之凡賓客諸侯有卿訝卿有大夫訝大夫有士訝士皆有訝凡訝者賓客至而往詔相其事而掌其治令

條狼氏掌執鞭以趨辟王出入則八人夾道公則六人侯伯則四人子男則二人凡誓執鞭以趨於前且今之誓僕右曰殺誓馭曰車轅誓大夫曰敢不關鞭五百誓師曰三百誓邦之大史曰殺誓小史曰墨舊本在司烜氏後

司圜掌收教罷民凡害人者弗使冠飾而加明刑焉任之以事而收教之能改者上罪三年而舍中罪二年而舍下罪一年而舍其不能改而出圜土者殺雖出三年不齒凡圜土之刑人也不虧體其罰人也不虧財舊本在丈人後

司厲掌盜賊之任噐貨賄辨其物皆有數量賈而揭之入于司兵其奴男子入于罪隸女子入舂槩凡有爵者與七十者與未亂者皆不為奴舊本在職金後掌囚掌守盜賊凡囚者上罪梏桎而桎中罪桎梏下罪梏王之同族桎有爵者桎以待弊罪及刑殺告刑于王奉而適朝士加明梏以適市而刑殺之凡有爵者與王之同族奉而適甸師氏以待刑殺舊本在司圜後掌戮掌斬殺賊諜而搏之凡殺其親者焚之殺王之親者辜之凡殺人者踣諸市肆之三日刑盜于市

刑後
刑後
刑後

木海內集 卷之八
凡罪之麗於灋者亦如之唯王之同族與有爵者
殺之于甸師氏凡軍旅田役斬殺刑戮亦如之墨
者使守門劓者使守闕宮者使守內刑者使守圜
髡者使守積

蜡氏掌除骹凡國之大祭祀令州里除不蠲禁刑者
任人及凶服者以及郊野大師大賓客亦如之若
有死於道路者則令埋而置揭焉書其日月焉縣
其衣服任噐于有地之官以待其人掌凡國之骹

禁舊本在野廬氏後

雍氏掌溝瀆澮池之禁凡害於國稼者春令爲阱獲

溝瀆之利於民者秋令塞阱杜獲禁山之爲苑澤
之沈者

萍氏掌國之水禁幾酒謹酒禁川游者

冥氏掌設弧張爲阱獲以攻猛獸以靈鼓毆之若得

其獸則獻其皮革齒須備舊本在脩閭氏後

庶氏掌除毒蠱以攻說禴之嘉草攻之凡毆蠱則令
之比之

穴氏掌螫獸各以其物火之以時獻其珍異皮革

翬氏掌攻猛鳥各以其物爲媒而掎之以時獻其羽

翮

柞氏掌攻草木及林麓夏日至令刊陽木而火之冬
日至令剝陰木而水之若欲其化也則春秋變其
水火凡攻木者掌其政令

雉氏掌殺草春始生而萌之夏日至而夷之秋繩而
芟之冬日至而耜之若欲其化也則以水火變之
掌凡殺草之政令

砮族氏掌覆天鳥之巢以方書十日之號十有二辰
之號十有二月之號十有二歲之號二十有八星
之號縣其巢上則去之

剪氏掌除蠹物以攻崇攻之以奔草熏之凡度蠱之

事

赤友氏掌除牆屋以蜃炭攻之以灰洒毒之凡隙屋
除其狸蟲

蝮氏掌去鼃黽焚牡鞠以灰洒之則死以其煙被之
則凡水蟲無聲

壺涿氏掌除水蟲以炮土之鼓毆之以焚石投之若
欲殺其神則以牡槀午貫象齒而沈之則其神死
淵為陵

庭氏掌射國中之天鳥若不見其鳥獸則以救日之
弓與救月之矢射之若神也則以太陰之弓與枉

矢射之

大人掌犬牲凡祭祀共犬牲用牲物伏痊亦如之凡
幾珥沈辜用駝可也凡相犬牽犬者屬焉掌其政

治舊本在
司厲後

司隸掌五隸之灋辨其物而掌其政令帥其民而搏
盜賊役國中之辱事為百官積任器凡囚執人之
事邦有祭祀賓客喪紀之事掌帥四翟之隸使之
皆服其邦之服執其邦之兵守王宮與野舍之厲

禁舊本在
掌戮後

蠻隸掌役校人養馬其在王宮者執其國之兵以守

王宮在野外則守厲禁閩隸使役掌畜而養鳥而
阜蕃教擾之掌子則取隸焉使役牧人養牛馬與
鳥言其守王宮者與其守厲禁者如蠻隸之事貉
隸掌役服不氏而養獸而教擾之掌與獸言其守
王宮者與其守厲禁者如蠻隸之事罪隸使役百
官府與凡有守者掌使令之小事凡封國若家牛
助為牽傍其守王宮與其守厲禁者如蠻隸之事

掌察亡

掌貨賄亡

都則亡

周禮定本十三

周禮正經

冬官篇

大司空之職掌建邦之土地之圖與其人民之數以佐王安擾邦國以天下土地之圖辨其邦國都鄙之數制其畿疆而溝封之設其社稷之壇而樹之田主各以其野之所宜木遂以名其社與其野以土會之灋辨五地之物生一曰山林其動物宜毛物其植物宜阜物其民毛而方二曰川澤其動物宜鱗物其植物宜膏物其民黑而津三曰丘陵其

動物宜羽物其植物宜覈物其民專而長四曰墳衍其動物宜介物其植物宜莢物其民皙而瘠五曰原隰其動物宜羸物其植物宜叢物其民豐肉而痺以土宜之灋辨其十有二土之名物以相民宅而知其利害以阜人民辨十有二壤之物而知其種以教稼穡樹藝以土均之灋辨五物九等制天下之地征以作民職以令地貢以歛財賦以均齊天下之政以土圭之灋測土深正日景以求中日南則景短多暑日北則景長多寒日東則景夕多風日西則景朝多陰日至之景尺有五寸謂之

地中天地之所合也四時之所交也風雨之所會也陰陽之所和也然則百物阜安乃建王國焉制其畿方千里而封樹之凡建邦國以土圭土其地而制其域諸公之地封疆方五百里其食者半諸侯之地封疆方四百里其食者參之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者四之一凡造都鄙制其地域而封溝之以其室數制之不易之地家百畝一易之地家二百畝再易之地家三百畝乃分地職奠地守制地貢而

頒職事焉以為灋而待政令以九職任萬民一曰三農生九穀二曰園圃毓草木三曰虞衡作山澤四曰藪牧養蕃鳥獸五曰百工飭化八材六曰商賈阜通貨賄七曰嬪婦化治絲枲八曰臣妾聚斂疏材九曰閒民無常職轉移執事以九職至此八十字舊本係天官大宰職訂移屬此以保息六養萬民一曰慈幼二曰養老三曰振窮四曰恤貧五曰寬疾六曰安富以本俗六安萬民一曰燬宮室二曰族墳墓三曰聯兄弟四曰聯師儒五曰聯朋友六曰同衣服以荒政十有二聚萬民一曰散利二曰薄征三曰緩刑四曰

林漢內集 卷之八
弛力五曰舍禁六曰去幾七曰青禮八曰殺哀九
曰蕃樂十曰多昏十有一曰索鬼神十有二曰除
盜賊大賓客令野脩道委積大軍旅大田役以旗
致萬民而治其徒庶之政令若國有大故則致萬
民於王門令無節者不行於天下

小司空之職掌邦之野以土地之圖經田野造縣鄙
形體之灋遂人職文凡建邦國立其社稷正其畿疆之
封乃經土地而井牧其田野九夫為四井四井為
邑四邑為丘四丘為甸四甸為縣四縣為都以任
地事而令貢賦凡稅斂之事乃分地域而辨其守

施其職而平其政乃均土地以稽其人民而周知
其數上地家七人可任也者家三人中地家六人
可任也者家五人下地家五人可任也者家二人
凡起徒役毋過家一人以其餘為羨唯田與追胥
竭作以上俱小司徒職文五家為鄰五鄰為里四里為鄩五
鄩為鄙五鄙為縣五縣為遂皆有地域溝樹之使
各掌其政令刑禁凡治野以下劑致阡以田里安
阡以樂昏擾阡以土宜教阡稼穡以興鋤利阡以
時噐勸阡以疆予任阡以土均平政辨其野之土
上地中地下地以頒田里上地夫一廛田百畷萊

五十畷餘夫亦如之中地夫一廛田百畷萊百畷
餘夫亦如之下地夫一廛田百畷萊二百畷餘夫
亦如之凡治野夫間有遂遂上有徑十夫有溝溝
上有畛百夫有洫洫上有涂千夫有澮澮上有道
萬夫有川川上有路以達于畿以歲時登其夫家
之衆寡及其六畜車輦辨其老幼廢疾與其施舍
者以頒職作事以令貢賦以起令師田以起政役
凡國祭祀共野牲令野職凡賓客令脩野道而委
積大喪帥六遂之役而致之掌其政令及葬帥而
屬六綽及窆陳役凡事致野役而師田作野民帥

而至掌其政治禁令

俱遂人
職文

遂師各掌其遂之政令戒禁以時登其夫家之衆寡
六畜車輦辨其施舍與其可任者經牧其田野辨
其可食者周知其數而任之以徵財征作役事則
聽其治訟巡其稼穡而移用其民以救其時事凡
國祭祀審其誓戒共其野牲入野職野賦于玉府
賓客則巡其道脩庀其委積大喪使師其屬以幄
帟先道野役及窆抱磨共丘籠及蜃車之役軍旅
田獵平野民掌其禁令比敘其事而賞罰
遂大夫各掌其遂之政令以歲時稽其夫家之衆寡

辨其可任者國中自七尺以及六十野自六尺以
及六十有五皆征之其舍者國中貴者賢者能者
服公事者老者疾者皆舍辨其至皆舍係
卿大夫職文以教稼
穡以稽功事掌其政令戒禁聽其治訟令爲邑者
歲終則會政致事正歲簡稼器脩稼政三歲大比
則帥其吏而興甿明其有功者屬其地治者凡爲
邑者以四達戒其功事而誅賞廢興之

縣正各掌其縣之政令徵比以頒田里以分職事掌
其治訟趨其稼事而賞罰之若將用野民師田行
役移執事則帥而至治其政令既役則稽功會事
而誅賞

鄙師各掌其鄙之政令祭祀凡作民則掌其戒令以
時數其衆庶而察其媿惡而誅賞歲終則會其鄙
之政而致事

鄣長各掌其鄣之政令以時校登其夫家比其衆寡
以治其喪紀祭祀之事若作其民而用之則以旗
鼓兵革帥而至若歲時簡器與有司數之凡歲時
之戒令皆聽之趨其耕耨稽其女功

里宰掌比其邑之衆寡與其六畜兵器治其政令以
歲時合耦于耨以治稼穡趨其耕耨行其秩敘以

待有司之政令而徵歛其財賦

鄰長掌相糾相受凡邑中之政相贊徙于他邑則從而授之

土訓掌道地圖以詔地事道地慝以辨地物而原其生以詔地求王巡守則夾王車

誦訓掌道方志以詔觀事掌道方慝以詔辟忌以知地俗王巡守則夾王車

司稼掌巡邦野之稼而辨種稂之種周知其名與其所宜地以爲灋而縣于邑閭巡野觀稼以年之上下出歛灋掌均萬民之食而調其急而平其興

草人掌土化之灋以物地相其宜而爲之種凡糞種駢剛用牛赤緹用羊墳壤用麋渴澤用鹿鹹瀉用貍勃壤用狐埴壚用豕疆藥用蕢輕麤用犬

稻人掌稼下地以豬畜水以防止水以溝蕩水遂均水以列舍水以滄寫水以步揚其芟作田凡稼澤夏以水殄草而芟夷之澤草所生種之芒種早曠共其雩歛喪紀共其葦事

場人掌國之場圃而樹之果蓏珍異之物以時歛而藏之凡祭祀賓客共其果蓏享亦如之

圉人掌圉游之獸禁牧百獸祭祀喪紀賓客共其生

本溪內集 卷之八
獸死獸之物

掌畜掌養鳥而阜蕃教擾之祭祀共卵鳥歲時貢鳥
物共膳獻之鳥

舊本屬夏官

載師掌任土之灋以物地事授地職而待其政令以
廛里任國中之地以場圃任園地以宅田土田賈
田任近郊之地以官田牛田賞田牧田任遠郊之
地以公邑之田任甸地以家邑之田任稍地以小
都之田任縣地以大都之田任疆地凡任地國宅
無征園廛二十而一近郊十一遠郊二十而三甸
稍縣都皆無過十二唯其漆林之征三十而五凡
宅不毛者有里布凡田不耕者出屋粟凡民無職
事者出夫家之征以時徵其賦

閭師掌國中及四郊之人民以任其力以待其政令
以時徵其賦凡任民任農以耕事貢九穀任圃以
樹事貢草木任工以飭材事貢器物任商以市事
貢貨賄任牧以畜事貢鳥獸任嬪以女事貢布帛
任衡以事貢其物任虞以澤事貢其物凡無職
者出夫布凡庶民不畜者祭無牲不耕者祭無盛
不樹者無棹不蠶者不帛不績者不衰

縣師掌邦國都鄙稍甸郊里之地域而辨其夫家人

民田萊之數及其六畜車輦之稽三年大比則以攷群吏而以詔廢置若將有軍旅會同田役之戒則受灋于司馬以作其衆庶及牛馬車輦會其車人之卒伍使皆備旗鼓兵器以帥而至凡造都邑量其地辨其物而制其域以歲時徵野之賦貢均人掌均地政均地守均地職均人民之力政凡令賦以地與民制之土地食者參之二其民可用者家三人中地食者半其民可用者二家五人下地食者參之一其民可用者家二人凡均力政以歲上下豐年則公旬用三日焉中年則公旬用二日

焉無年則公旬用一日焉凶札則無力政無財賦不收地守地職不均地政三年大比則大均稍人掌令丘乘之政令若有會同師田行役之事則以縣師之灋作其司徒輦輦帥而以至治其政令以聽於司馬大喪帥蜃車與其役以至掌其政令以聽於司徒
旅師掌聚野之勑粟屋粟間粟而用之以質劑致民平頒其興積施其惠散其利而均其政令凡用粟春頒而秋歛之凡新阡之治皆聽之使無征役以地之媿惡爲之等

山虞掌山林之政令物爲之厲而爲之守禁仲冬斬陽木仲夏斬陰木凡服耜斲季材以時入之令萬民時斲材有期日凡邦工入山林而掄材不禁春秋之斲木不入禁凡竊木者有刑罰若祭山林則爲主而脩除且蹕若大田獵則萊山田之野及弊田植虞旗于中致禽而珥焉

林衡掌巡林麓之禁令而平其守以時計林麓而賞罰之若斲木材則受灋于山虞而掌其政令

川衡掌巡川澤之禁令而平其守以時舍其守犯禁者執而誅罰之祭祀賓客共川奠

澤虞掌國澤之政令爲之厲禁使其地之人守其財物以時入之于玉府頒其餘萬民凡祭祀賓客共澤物之奠喪紀共其葦蒲之事若大田澤則萊澤野及弊田植虞旌以屬禽

迹人掌邦田之地政爲之厲禁而守之凡田獵者受令焉禁麇卵者與其毒矢射者

非人掌金玉錫石之地而爲之厲禁以守之若以時取之則物其地圖而受之巡其禁令

角人掌以時徵齒角凡骨物於山澤之農以當邦賦之政令以度量受之以共財用

羽人掌以時徵羽翮之政于山澤之農以當邦賦之
政令凡受羽十羽為審百羽為搏十搏為縛

掌葛掌以時徵締絡之材于山農凡葛征徵草貢之
材于澤農以當邦賦之政令以權度受之

掌染草掌以春秋歛染草之物以權量受之以待時
而頒之

掌炭掌灰物炭物之徵令以時入之以權量受之以
共邦之用

掌荼掌以時聚荼以共喪事徵野䟽材之物以待邦
事凡畜聚之物

掌蜃掌歛互物蜃物以共闡壙之蜃祭祀共蜃噐之
蜃共白盛之蜃

春人掌共米物祭祀共其盥盛之米賓客共其牢禮
之米凡饗食共其食米掌凡米事

稟人掌九穀之數以待國之匪頒賜稍食以歲之
上下數邦用以知足否以詔穀用以治年之凶豐
凡萬民之食食者人四鬴上也人三鬴中也二鬴
下也若食不能人二鬴則令邦移民就穀詔王殺
邦用凡邦有會同師役之事則治其糧與其食大
祭祀則共其接盛

舍人掌凡祭祀共蓋簋實之陳之賓客亦如之共其
禮車米筥米芻禾喪紀共飯米熬穀以歲時縣種
稂之種以共王后之春獻種掌米粟之出入辨其
物歲終則會計其政

倉人掌粟入之藏辨九穀之物以待邦用若穀不足
則止餘瀆用有餘則藏之以待凶而頒之凡國之
大事共道路之穀積食飲之具

遺人掌邦之委積以待施惠鄉里之委積以恤民之
羸阨門關之委積以養老孤郊里之委積以待賓
客野鄙之委積以待羈旅縣都之委積以待凶荒
凡賓客會同師役掌其道路之委積凡國野之道
十里有廬廬有飲食三十里有宿宿有路室路室
有委五十里有市市有候館候館有積凡委積之
事巡而比之以時頒之

委人掌歛野之賦歛薪芻凡䟽材木材凡畜聚之物
以稍聚待賓客以甸聚待羈旅凡其餘聚以待頒
賜以式灋共祭祀之薪蒸木材賓客共其芻薪喪
紀共其薪蒸木材軍旅共其委積薪芻凡䟽材共
野委兵器與其野圃財用凡軍旅之賓客館焉

槁人掌共外內朝冗食者之食若饗耆老孤子士庶

子共其食掌豢祭祀之犬

職方氏掌天下之圖以辨其邦國都鄙四夷八蠻七
閩九貉五戎六狄之人民與其財用九穀六畜之
數要周知其利害乃辨九州之國使同貫利東南
曰揚州其山鎮曰會稽其澤藪曰具區其川三江
其浸五湖其利金錫竹箭其民二男五女其畜宜
鳥獸其穀宜稻正南曰荊州其山鎮曰衡山其澤
藪曰雲夢其川江漢其浸潁湛其利丹銀革齒其
民一男二女其畜宜鳥獸其穀宜稻河南曰豫州
其山鎮曰華山其澤藪曰圃田其川滎雒其浸波

澹其利林漆絲枲其民二男三女其畜宜六擾其
穀宜五種正東曰青州其山鎮曰沂山其澤藪曰
望諸其川淮泗其浸沂沐其利蒲魚其民二男二
女其畜宜雞狗其穀宜稻麥河東曰兖州其山鎮
曰岱山其澤藪曰大野其川河沛其浸廬維其利
蒲魚其民二男三女其畜宜六擾其穀宜四種正
西曰雍州其山鎮曰嶽山其澤藪曰弦蒲其川涇
汭其浸渭洛其利玉石其民三男二女其畜宜牛
馬其穀宜黍稷東北曰幽州其山鎮曰醫無閭其
澤藪曰豸養其川河沛其浸菑時其利魚鹽其民

一男三女其畜宜四擾其穀宜三種河內曰冀州
其山鎮曰霍山其澤藪曰楊紆其川漳浦其浸汾
潞其利松柏其民五男三女其畜宜牛羊其穀宜
黍稷正北曰并州其山鎮曰恒山其澤藪曰昭餘
祁其川厚池嘔夷其浸涑易其利布帛其民二男
三女其畜宜五擾其穀宜五種乃辨九服之邦國
方千里曰王畿其外方五百里曰侯服又其外方
五百里曰甸服又其外方五百里曰男服又其外
方五百里曰采服又其外方五百里曰衛服又其
外方五百里曰蠻服又其外方五百里曰夷服又

其外方五百里曰鎮服又其外方五百里曰藩服
凡邦國千里封公以方五百里則四公方四百里
則六侯方三百里則七伯方二百里則二十五子
方百里則百男以周知天下凡邦國小大相維王
設其牧制其職各以其所能制其貢各以其所有
王將巡守則戒于四方曰各脩乎乃守考乃職事
無敢不敬戒國有大刑及王之所行先道帥其屬
而巡戒令王殷國亦如之

形方氏掌制邦國之地域而正其封疆無有華離之
地使小國事大國大國比小國

山師掌山林之名辨其物與其利害而頒之于邦國使致其珍異之物

川師掌川澤之名辨其物與其利害而頒之于邦國使致其珍異之物

邊師掌四方之地名辨其丘陵墳衍邊隰之名物之可以封邑者

司勲掌六卿賞地之灋以等其功王功曰勲國功曰功民功曰庸事功曰勞治功曰力戰功曰多凡有功者銘書於王之太常祭於大烝司勲詔之大功司勲藏其貳掌賞地之政令凡賞無常輕重職功

凡頒賞地參之一食唯加田無國正

量人掌建國之灋以分國為九州營國城郭營后宮量市朝道巷門渠造都邑亦如之營軍之壘合量其市朝州涂軍社之所里邦國之地與天下之涂數皆書而藏之凡祭祀饗賓制其從獻脯燔之數量掌祭奠竈之俎實凡宰祭與鬱人受筭歷而皆飲之

掌舍掌王之會同之舍設楹桓再重設車宮轅門為壇壝宮棘門為帷宮設旌門無宮則共人門凡舍事則掌之

幕人掌帷幕幄帟綬之事凡朝覲會同軍旅田役祭祀共其帷幕帟綬大喪共帷幕帟綬三公及卿大夫之喪共其帟

掌次掌王次之灋以待張事王大旅上帝則張氈案設皇邸朝日祀五帝則張大次小次設重帟重案合諸侯亦如之師田則張幕設重帟重案諸侯朝覲會同則張大次小次師田則張幕設案孤卿有邦事則張幕設案凡喪王則張帟三重諸侯再重孤卿大夫不重凡祭祀張其旅幕張尸次射則張耦次掌凡邦之張事

內集八卷終

刻梓溪舒先生文集跋

昔鄉先正梓溪舒先生大魁內翰以文章氣節爲時名臣諸先達歷著論與一峰羅先生並稱云遺文久未刻布會本道觀察漆公得之厥孫春元琛又以閩爲先生過化之地屬下吏增訂梓以廣其傳噫讀是集者不惟可以想見先生之風而於觀察公嘉惠盛心併得之矣刻成因識歲月如左萬曆丙子季春既望知建陽縣事後學撫郡李增頓首跋



水滸台

卷

